



**Protocol 05/2021**  
**Radunanza generala da rendaquint e d'elecziun**  
**venderdi, 16 avrigl 2021**  
**in sala chasa pravenda a las 20.00**

**Preschaints :** 20 commembers

Adrian Barbüda da Lauber Barbüda fiduziari SA  
Benedict Stecher da la fmr  
Ravarenda Niklaus Friedrich

Peder Rauch, anteriur president  
Annina Kasper, presidenta  
Erna Koller  
Flurina Auer  
Agatha Mengiardi

Revisurs da quint

**S-chüsats:** Silvia Stecher  
Jon Domenic Parolini  
Staschia e Jon Janett  
Andri Kasper  
Seraina Roner  
Renate Fehres  
Tamara Kaufmann  
Domenica Raisun

**Presidi:** Annina Kasper

**Protocol:** Selina Bisaz

**Tractandas:**

1. Salüd da la presidenta
2. Elecziun dombravuschs
3. Far bun il protocol da la radunanza da büdschet dals 27 november 2020
4. Rapport annual da la presidenta
5. Rapport annual sur dals arrandschamaints
6. Rendaquint da l'on 2020\*
7. Rapport dals revisuors da quint
8. Sortidas ed elecziuns
  - Sortida dad Erna Koller, vicepresidenta consistori
  - Elecziun da Flurina Auer co vicepresidenta consistori
9. Orientaziuns
  - 5G sül clucher da baselgia
  - acustica illa baselgia

10. Il ravenda ha il pled

11. Varia

### **Infuormaziuns/Informationen**

**\*Il rendaquint da l'on 2020** ha pudü gnir vis aint sülla pagina web da la corporaziun evangelica da Scuol-Tarasp ([www.scuol-ref.ch](http://www.scuol-ref.ch)) o gnir postà pro'l secretariat per telefon: 081 860 34 10 o mail: [secretariat.pravenda@bluewin.ch](mailto:secretariat.pravenda@bluewin.ch). *Der Geschäftsabschluss 2020 konnte auf der Homepage der reformierten Kirchgemeinde Scuol-Tarasp eingesehen werden oder beim Sekretariat bestellt werden. Er wird dem Protokoll beigefügt.*

### **Tractanda 1: Salüd da la presidenta**

Annina Kasper, la nouva presidenta daspö november 2020, salüda a la raspada cun ün special salüd a Benedict Stecher da la fmr, ad Adrian Barbüda ed a Peder Rauch.

### **Tractanda 2: Elecziun da dombravuschs**

Linard Marugg vain elet unanimaing co dombravusch.

### **Tractanda 3: Far bun il protocol da la radunanza da büdschet dals 27 november 2020**

Il protocol da la radunanza da büdschet dals 27 november 2020 ha pudü gnir vis aint ouravant sülla pagina web da Scuol e vain fat bun unanimamaing.

### **Tractanda 4: Rapport annual da la presidenta**

Causa cha Peder es stat president fin in november prelegia el seis rapport. Il rapport vain agiunt al protocol.

Martin dumonda a Peder co chi'd es stat culla suottascripziun per la fabrica, sch'el ha laschà sclerir ad Armon Vital insembel cul cussagl da cumün schi voul üna o duos suottascripziuns. Tema 5G vain trattà plü tard.

In seis rapport ingrazcha Annina a Peder per seis ingaschamaint e seis agüd e quel dad Erna Koller per lavurar aint illa materia. Eir quist rapport vain agiunt al protocol.

### **Tractanda 5: Rapport annual sur dals arrandschamaints**

Flurina infuormescha davart differents arrandschamaints. No pensain chi sto esser üna baselgia vivainta (lebendige Kirche). Eir cun Corona, i's sto spordscher specials cults divins. Ün bun exaimpel d'eiran las fanestras o portas dad Advent, quai d'eira ün bun cumanzamaint per il temp da Nadal.

Ils 14 marz haja dat ün cult divin da jazz cun Alexander Curtius e Flurin Vital, quia vaina surgnü rebombs positivs.

Venderdi Sonch han sunà Sun e Tun. Per la dumengia da Pasqua haja dat ün cult divin a las 5 la bunura cun ün fö davant baselgia e la chandaila da Pasqua chi dess arder d'ürant tuot l'on pels cults divins. Implü sun planisats divers cults divins, per exaimpel per Ascensiuin ün cult divin dadoura davant baselgia scha pussibel, ed ils 1 avuost a S-charl. Il consistori es avert per novas ideas da la raspada.

### **Tractanda 6: Rendaquint da l'on 2020**

Il rendaquint ed il bilantsch vegnan agiunt a quist protocol. Adrian Barbüda dà a tuots il rendaquint ed il bilantsch dal 2020 e declera ils differents puncts.

Vair rendaquint agiunt.

L'on 2020 vaina pudü trar giò daplü da la facultà d'investiziun da la chasa pravenda sco l'on 2019.

Pervi da Corona haja dat pü pacas collectas.

### **Tractanda 7: Rapport revisuors**

Ilis revisuors Tina Bott e Valentin König infuormeschan chi han examinà als 27 marz 2021 in basa dals statüs e la ledscha la contabilità fin als 31.12.2020. Il consistori es respunsabel pel quint. Ilis cudeschs sun manats in fich bun uorden e correspuondan a las normas. Ilis revisuors raccumondan dad approvar il rendaquint.

Al listess mumaint infuormeschan ilis revisuors chi s'han decis da's retrar e far piazza a gliעד nouva e plü giuvna. Annina ingrazcha per lur lavur praistada. Las tschernas vegnan fattas prosma jada.

Il rendaquint dal 2020 vain fat bun unanimaing.

### **Tractanda 8: Sortidas ed elecziuns**

- **Sortida dad Erna Koller, vicepresidente consistori**

Erna Koller sorta dal consistori. Annina ingrazcha ad Erna Koller per sia buna lavur e surdà üna chavogna gronda co regal. Tuots applaudischan.

- **Elecziun da Flurina Auer co vicepresidente consistori**

Per la tscherna vain Flurina Auer propon üda co vicepresidente dal consistori. La proposta vain approvada unanimaing ed i dà ün applaus.

### **Tractanda 9: Orientaziuns**

- **5G sül clucher da la baselgia**

Annina infuormescha ch'ella ha tschüff ün telefon da sar Roland Hefti chi tilla ha imnatschada. Els han scleri cha'ls permiss sun valabels e cha üna suottascripziun pel permiss da fabrica basta.

Annina ha gnü blers telefons cul cumün e iurists da la baselgia chantunala e chantunal politic pels cumüns.

Resultats nu sun clers che chi vaglia.

Martin surpiglia il pled e declera la situaziun. Tenor el nu vezza oura bain. Tenor ün memorandum da 7 paginas dad ün collega iurist nun as poja far nüglia.

I dà 2 puncts. Il prüm punct es schi's po insomma far alch cunter ün contrat chi's ha suottascrip? I dà be pacas excepziuns chi fan persvader iüdischs. L'unic füss da muossar sü cha'l dischavantag dal contrat es uschè grond cha la corporaziun nu po viver cun quai. Quai füss schi dess sortidas e grondas dispittas pervi da quai. Suot talas cundiziuns nu's poja acceptar il contrat.

Lura as poja sperar chi detta üna soluziun cun far las bellinas cun Swisscom. Ma tenor Martin nu funcziunarà quai. In Alpnach haja dat ün cas simil chi ha dat ün cas iuridic. L'advocat ha dit chi dà amo üna roba per gnir liber, ma per quai dovra ün lung flà.

Annina ha gnü l'idea dad includer o dumondar la protecziun da monumaints. Ed eir il cumün güda inavant a cumbatter per trar in lunga. l'I Mas-chalch dals 15 avrigl d'eira aint üna infuormaziun a regard ün moratorium.

No scrivain üna charta a sar Hefti per dumandar da schoglier il contrat.

Dumondas: I vain la dumonda scha la Swisscom nu po listess metter sü l'antenna sch'ella vou? Sunrise e Salt han fingià miss sü pro Gurlaina, ma quai es dadour cumün. Lura es eir la dumonda co cha'l cumün pro prolongar il moratorium?

Vairamaing nun es quai ün moratori. Martin declera chi'd es ün recuors. Prüm as stoja spettar la resposta, davo as poja recurrar.

Annina disch cha Jon Anton Schmid ha tramiss tuot oura a sar Pally. I nu dà ingüns statüts concrets a regard las duos suottascripziuns e chi basta üna suottascripziun. Chasper Roner disch ch'el ha üna duonna sensibla e manzuna chi pertocca eir la sandà, cha quai saja ün aspet important.

Annina disch cha Hefti manaja cha Scuol saja ün lö da turissem e dovra perquai 5G. Ma tenor Annina vaina tuot svelto avuonda ed i nun es sgür che effet cha'ls razs han fin uossa. Fin uossa nun es cumprovà viceversa, fin lura cumbattain. Flurinda Raschèr disch cha na be Scuol ha quel problem.

- **Acustica illa baselgia**

Pervi da Corona s'ha la situaziun trat in lunga. Ün cuntschaint dad Erna, sar Stadler, es prossem cult divin in baselgia per testar differents apparats per l'acustica. Tuots sun invidats da gnir a prouvar oura.

### **Tractanda 10: Il ravarenda ha il pled**

Il ravarenda Niklaus Friedrich manzuna cha davo quists blers plects voul el preleger ün'istorgia da Franz Hohler, (Das Kurze, das Einfache, das Kindliche) ed our da la part „Abschluss“, chi s'affà tenor el a quist mumaint in radunanza. Las cuortas istorginas as nomnan „Die Kreide und der Schwamm“ e „die Kreide“. Niklaus giavüscha a tuots bler plaschair.

### **Tractanda 11: Varia**

La presidenta infuormescha a la radunanza dals seguaints temas:

- Als 17 marz es statta la radunanza ecclesiastica. Flurina Auer, Annina Kasper e Niklaus Friedrich han tut part. Nouv es cha duos persunas dal consistori ed il ravarenda sun delegats. Nouv es eir üna gruppa per arrandschamaints, eir Niklaus es lapro.
- La Not lunga da las baselgias ha lö ils 28 mai ad Ardez per tuot la regiun. Id es ün bel program in differents lös, dadaint e dadoura, arrandschamaints e cults divins. I dà flyers per tscherchar a persunas motivadas da participar e sunar o preschantar alch sün via. Eventualmaing as poja organisar ün transport. Per quai as poja contactar il secretariat.
- Collavuraziun cun Sent: Quist es ün tema actual.
- Per rumir diversa roba da la chasa pravenda (archiv) vain dovrà ün veicul grond, Annina dumonda scha qualchün füss pront da sustegner cun quai.
- Chasper Roner manzuna l'acustica in baselgia. Annina manzuna il prossem cult divin ingio chi vain testà l'acustica.
- Chasper manzuna eir chi'd es ün strapazi da chaminar sü vers baselgia e schi nu füss pü simpel a far üna s-chala chi muainta o ün ascensur. Annina voul amo sclerir quai. Ün'otra opziun füssan sopchas cun rouda electricas. O chi's po ir sü cul auto.
- Flurinda Raschèr manzuna il tema dal sustegn pro'l dudir e ch'ella voul dudir in baselgia e che chi sun las ideas da megldrar la situaziun. Annina disch cha in dumengia vegn ün specialist e maina ün headset, el prouva oura differents apparats. Implü es meglder schi's sezza a schnestra, davant. Giò da chanzla esa plü greiv dad udir. Eir ils amplifichadurs vegnan controllats.
- Brigitta Barba disch cha pro nos ravarenda nu saja ün problem, ma pro ravarenda Magnus Schleich saja greiv dad incleger, perche ch'el nu discuorra cler. Ella voul savair che chi's voul megldrar. Annina disch l'acustica ed ils indrizz.

- Erna declera chi dà duos headsets, eir ün pel rimplazzant.
- Peter Langenegger remarcha chi saja il terz acustiker chi vain. La baselgia saja dal 1516. Cur chi's ha construi d'eira fat pel chant, na pel pled. Nossa baselgia saja cuntschainta in tuot la Svizra per la buna acustica. Bliers vegnan fich jent a sunar in nossa baselgia. Plü bod gnivan las liturgias chantadas. El manzuna cha l'udida es fich individuala ed id es üna problematica difficila.
- Annina manzuna cha per quai vulain far daplü concerts cun chant e musica e cha lain drivir daplü la baselgia per tuots. Peter disch chi'd es cler cha cun daplü glied esa plü greiv dad udir. Culla refuorma saja gnü il pled pü important.
- Annina manzuna cha Agatha ha pitturà bels övs per Pasqua. I sun gnüts 20 persunas al cult divin da Pasqua a bunura a las 5, quai es daplü co pro'ls ultims cults divins. Id es stat bellischem cul fö davant baselgia.
- Ella spera chi va inavant sco plü bod, sainza Corona, cun blier blier chant e musica.

La presidenta serra la radunanza a las 21.30.

Pel protocol:

La presidenta

Selina Bisaz

Annina Kasper

Scuol, 28 avrigl 2021